

Gea per il Gripen – na a pajas minimalas

La pcd ha fixà las parolas per las proximas votaziuns

■ (anr/gc) **Da la radunanza da la Partida cristiandemocratica (pcd) dal Grischun mesemna a Tusaun han 77 delegadas e delegads prendì part. Cun 59:16 vuschs han els detg gea a la cumpra da 22 aviuns da cumbat Gripen.** Suenter ina preschentaziun cuntradictoria è vegnì decidì cun 67:1 vusch da refusar l'iniziativa per pajas minimalas, fertant ch'ìl provediment medicinal da basa ha chattà sustegn unanim.

Be piz e cup è la suprastanza s'exprimida per sa proteger da pedofils. Ina pitschna revisiun da las statutas ha pertutgà la fixaziun da la successiun dals candidats sin la glista dal cussegl naziunal e lubì a la suprastanza da decider davart colliar glistas.

Pia sa vendain nus miserabel

Il president da la pcd, cuss. dals chantuns, *Stefan Engler*, ha exprimì en il pled introductiv sia gronda trumpada co la pcd vegnia giuditgada e percepida da la populaziun. Be 8% la considereschian sco schliadra da problems. Qua saja i dad agir. El na chapescha betg co las ulteriuras partidas burgaisas (pbd, pps, pld) pudessian schliar meglier ils problems da noss chantun che la pcd. I stoppia esser che nus sa vendian miserabel. La pcd fetschia ina politica persvadenta per la famiglia ed il stan mez. Mintgacass vul ella cuntinuar il dialog cun tadlar, chapir ed agir cun preschentar schliaziuns.

Roland Kunfermann, che candidescha per deputà en il circol da Tusaun, ha preschentà en pled e film la vischnanca da Tusaun sco impurtant center cultural e regional.

Preschentà ils projects da votaziun

Per il cuss. naz. cristiandemocrat *Jakob Büchler*, dal chantun S. Gagl, vai tar la cumpra da 22 Gripens per 3,1 milliardas per garantir la segirezza e neutralitad dal pajais e remplazzar ils 54 aviuns dal tip Tiger. La stabilitad politica saja la basa dal model da success Svizra. Segirezza na dettia i betg senza l'armada e nagina tala senza aviatica. Politica da segirezza muntia esser preparà per l'avegnir. Dir gea al Gripen garantisce segirezza per tuts. Quai vul la pcd grischuna.

L'anterieur deputà, *Vitus Locher*, Domat, fa part dal comité d'iniziativa per ina paja minimala da 4000 francs il mais. Quai muntia 22 francs l'ura per 42 uras lavur ad emna. Oz na cuntanschian pli che 300 000 – u 9 per tschient – betg quel salari minimal. Blers èn perquai dependents d'agid social. Tal pudessian ins reducir – per milliuns – cun introducir ina paja da 4000 francs il mais. Quai dessi era dapli entradas per la AVS. Quella proposta portia a blers insatge. Cun introducir talas pajas stgaffeschian ins era dapli justia e cumbattia la povradad. – E tuttina refusa la pcd prest unanimamain l'iniziativa – suenter avair udì l'argumentaziun e motivaziun da deputà *Livio Zanetti*, Landquart. Quella na saja betg il dretg med per schliar quel problem.

Cun il conclus federal davart il provediment medicinal da basa vulan ins – tenor deputada *Gabriela Tomaschetter*, Trun – al rinforzar. I giaja per garantir in provediment sufficient, accessibel per tuts e d'auta qualitat. Ina da las pli impurtantas pitgas saja quel provediment tras il medi da chasa. Era

vul ins resguardar meglier ils giavischs ed interess da la generaziun giuvna da medis e medias. Dir gea – sco quai che la pcd fa era – a quel conclus federal saja in cler confess al provediment da basa ch'è da muntada centrala per l'entira populaziun.

Resuns d'ina retschertga

A l'entschatta da quest onn ha la pcd grischuna tramess a sia basa in questunari cun set dumondas. 500, u 28%, han respundì. Cuss. gov. *Mario Cavigelli* preschenta e commentescha ils resultats.

88% èn per introducir il «Vote électronique». – Sustegnida vegn cun in resultat stretg la posiziun da la regenza per ina cunvivenza cun animals stgarpants (da rapina), mo vers lur preschientscha èn ils pli blers fitg critics. – Da mantegnair èn las scolas medias regionalas (91%). – Pertutgant realisaziun e produziun d'energia electrica è la protecziun da resguardar tuttina sco ils avantatgs, sche na anc dapli. – 80% èn per in segund tunnel tras il Gotard. – Ils possessurs duaian pudair disponer libramain da lur chasas e las pudair midar en regiuns cun flaivla structura excepziunalmain en segundas abitaziuns. – Grond sustegn hai dà per la pcd, perquai ch'ella sa posiziunescha sco partida da famiglia e dal stan mez.